

皇明詞林人物考

皇明詞林人物考卷之二

楚麻城王兆雲元禎輯著

豫順陽李 蔭楣燉閣訂

宋文恪

公名訥字仲敏滑人父壽卿仕元封公謚忠肅  
公少承家教矩矱自檢性持重不妄言笑齒貴  
胄館師友切磋學問該博益有造詣初舉進士  
爲鹽山知縣中更驛騷懷寶自晦洪武十三年  
徵詣公車除國子助教橫經發難擊部廓蒙學

者歸嚮嘗侍 上爲文渾健古雅十五年授翰林學士 上幸太學召公爲碑文紀之俄陞文淵閣大學士會太學成學徒日衆師生相訐教尼不行 上命公自文淵閣遷祭酒公嚴繩準推恩義身言並教提挈鎡礪不遺餘力寢食學廂不復家宿一時士皆適用 上御製詞哀公公嘗應詔陳安邊策言屯田之法 上嘉納公病遣中使諭卿又召其子麟侍養二十三年卒遣官致祭年八十諡文恪

王孟敷

王公名偁字孟敷父翰死義于勝國偁時才九歲翰友吳海撫而教之洪武中領鄉薦爲國子生養母盡孝永樂初以薦授翰林檢討進講

經筵與修大典爲總裁官張英公征交趾辟爲贊畫還京卒平生氣節高勁議論英發文章偉博書法道妙學士解縉嘗稱其人品在蘇長公之列文亦相類至于詩則陵轢漢唐使眉山見之未必不避竈而錫也所著有虛舟集至今海

内重之

張志道

國初有翰林侍講學士張志道名以寧號翠屏  
福之古田人元泰定進士嘗歷郡縣仕國子祭  
酒洪武間由薦舉復爲學士奉使安南卒時年  
七十矣能却重饋素有文名遺詩二卷宋濂劉  
三吾陳璉爲之序宋稱其豐腴而不流于叢冗  
雄峭而不失于粗厲清圓而不涉于浮巧委蛇  
而不病于細碎爲一代之奇作劉稱其節制以  
柳宏放以韓與蘇醺經飫史吞吐百氏爲一代

之完音陳稱其沉鬱雄健者可追漢魏清婉俊逸者足配盛唐今觀集中果亦不類常調宜表出之以示來學

唐處敬

唐肅字處敬自號丹崖居士杭之新城人父始遷越故今爲越之山陰人肅生有異質敏而克勤授毛詩比長兼通諸經旁及子史陰陽醫卜書數之學無不研究爲古文簡潔而雅奧律詩步驟盛唐樂府古詩上薄漢魏所著有平居稿文斷諸書尤工篆楷深得筆意至正壬寅歲充賦江浙以道梗不得上省臣便宜授杭州路黃岡書院山長轉嘉興路儒學正 國朝取浙



例起赴南京以憂還洪武三年春用薦至京纂  
修禮樂書其夏擢應奉翰林文字其秋科舉法  
行預考南京貢士扈從東宮拜英陵有襲衣  
之賜次年夏以疾失朝叅例免官歸後例謫役  
濠陽子之淳官侍講詩亦清麗

郭叅軍

淮南郭子章奎巢邑人師事青陽余公懸弧于  
勝代蓋棺于我明且嘗爲掾相府從軍塞垣厭  
左衽而願得真主其爲明人無疑故有望雲集  
二卷 國初宋潛溪輩叙之正靖間宮詹黃才  
伯同郡吳廷翰氏又嘗選之梓之當備明詩一  
家無疑叙或稱爲志士或稱爲美才又或謂履  
歷不可攷其清忠直亮之氣慷慨奇特之節堅  
貞靜一之守雄健俊逸之才一於是集見之然

則子章之爲人可知矣固不徒文詞爲爾也王鳳洲筆記云  
軍帥慕風流辭藻清麗一時重之良足翫賞  
格品可張徐之次

王忠文

公名禕字子克義烏人幼秀爽奇敏及能長身  
山立訖有偉度習古學師事黃潛戊子元政亂  
公爲書千言上時宰嫌其切直格不聞危素與  
張起岩並薦不報隱青岩山著書戊戌徵公署  
中書省掾商略機務上每稱子克不名間與  
論文章稱善因命取故實爲四言詩授太子  
辛丑進平江西頌上覽之曰吾固知浙東有  
二儒卿與宋濂爾學問之博卿不如濂才思之

雄濂不如卿授江南儒學提舉司校理乙巳除  
侍禮郎兼引進使轉起居注出同知南康府事

上即位召入議禮改漳州府通判上帝王祈  
天永命疏二年召修元史爲總裁官公史事擅  
長裁繁剔穢力任筆削書成拜翰林待制同知  
制誥兼國史院編修官三年預教大本堂公經  
明理達善開導召對殿庭必賜坐從容宴語未  
久奉使土蕃尋召還五年往諭雲南六月至諭  
梁王口 皇上聰明神聖天人歸心惟爾僻在

西南久阻聲教故遣使者來諭意亟宜奉版圖  
歸職方官爵如故身名俱全不然天討旦夕且  
至梁王不聽館別室數日又諭曰朝廷以雲南  
百萬生靈不欲殲于鋒刃曾不聞元綱解紐天  
兵西征不五六年天下大定爾恃險遠逆拒明  
命龍驤鷁艦會戰昆明悔無及矣梁王駭服有  
降意即爲改館會元遣使脫脫至雲南覘梁王  
有二心迫殺我使以固其意梁王持兩可不決  
匿公民間脫脫聞之誚梁王不得已出公與脫

脫相見脫脫欲屈公公罵曰天訖汝元命我朝  
實代之汝如爝火餘燼尚欲與日月爭光耶我  
將命遠來豈爲汝屈有死而已顧梁王曰汝朝  
殺我大兵旦夕至六年十二月竟被害年五十  
二公死後十五年子紳走雲南求父遺骸不得  
述滇南慟哭記後召爲國子博士正統六年贈  
公翰林學士謚忠文有所著集行于世

王達善

姚廣孝

公名達字達善無錫人洪武中以人材舉歷本  
邑及大同學訓成祖卽位遂由國子助教擢  
翰林編修未幾擢侍讀學士嘗與修太祖實  
錄有時名與解縉王汝玉等稱天下十才子所  
著詩文亦多今頗散逸但于天游撮藁中槩見  
之

姚廣孝相城人一名道衍削髮從釋教靖難佐  
太宗起燕邸累進太子少師卒贈榮國公謚



恭靖鳳洲筆記云少師棲遁禪宗衷嬰世網旣  
叅佐命卒叛初服互逃儒釋之間未獲進退之  
所其詩如入忉利天雖自快樂未就解脫魔障  
旣深終當墮落

胡忠安

公名湊字源潔常州武進人也生而髮白彌月  
乃黑在妊母李氏夢僧以花遺之覺而生湊亡  
何有僧來索觀湊見僧卽笑僧曰此吾師後身  
也命我求見以笑爲驗今果然聞者異之洪武  
庚辰登進士授兵科給事中遷右給事中永樂  
改元奏對稱旨陞戶科都給事中丁亥 文皇  
帝察湊忠實可託命巡遊以訪異人爲名實察  
人心向背也載馳者十有七年轍迹幾遍天下

雖窮鄉僻邑無不到者在湖廣尤最久丙申還  
朝進禮部左侍郎復出巡江浙癸丑自均襄還  
朝時 文皇帝征北虜駐蹕宣府馳謁行在所  
上方卧不出聞湊至喜甚起見湊勞之曰卿  
驅馳良苦賜坐與語凡所歷山川郡縣民情休  
苦悉陳說 上欣然不復疑慮比退漏下四鼓  
矣 仁廟監國時飛語上聞上屬湊生祭之湊  
至卽所見七事皆孝敬密疏以聞 上覓之大  
悅 仁廟卽位聞湊有密疏疑之乃轉太子

客兼南京國子祭酒一日閱章奏得浚所上密

疏深嘉其忠方議大用之而龍馭上賓矣章

皇帝卽位復禮部左侍郎兼官如故還任行在

禮部事宣德改元進尚書高煦反浚贊上親

征事平受上賞給叛者家屬四人丁未賜第長

安右門外給闈者二人戊申賜銀章四生日賜

宴于其第八月扈從巡邊己酉命兼詹事府事

五月扈從北巡辛亥命兼行在戶部事御製

詩賜浚及蹇義楊士奇楊榮四人而已因賜宴

盡醉而罷新建禮部成命光祿設宴大臣皆往  
賀湊立石聽事以紀之每燕見上輒問曰卿  
有何言奏入卽施行之正統初寵任益隆凡軍  
國重務悉與聞已巳上親征北虜畱守京師  
進太子太傅景泰初進少傅兼太子太師英  
廟復辟以老致仕家居七年卒年八十有九卒  
之日常守卓天錫夢湊來辭已而聞計異之贈  
太保謚忠安湊寬和樂易敬慎廉靜立朝幾六  
十年歷事六朝十知貢舉天下之士盡出其門

舉薦者甚衆平居無疾言遽色雖庸夫孺子皆知爲長者所著有芝軒集

劉季篬

公原名韶字季篬以字行浙江餘姚人也洪武甲戌進士授行人奉使雲南四川朝鮮謁贐一無所受事聞賜鈔襲衣丁丑陞陝西左叅政陝有逋賦民積歲不能輸有司峻刑督之季篬至慨然曰民困不能輸爲之父母又忍督責之耶乃下令緩其征民皆感激假貸以輸陝不產礪砂而歲有課額爲奏罷之召爲刑部左侍郎獄多平反尤重民命陝西王某爲強盜所引逮至

而盜已伏法不能自白乃召盜之妻子使識之而聽其詞竟得實王免于誣河陽逆旅夜有朱趙二人異室而宿朱怨家後追至乃誤殺趙朱實不知也主人疑朱殺之執送官考掠誣服季虎獨疑之曰是邂逅相聚非素有負且計其裝非有圖也特緩其獄居亡何有司竟得殺趙者而朱以緩獄不死揚州人胡氏夜有賊入其室殺人而遺刀屍傍旦視之刀柄有私識則其隣蘇氏也官捕鞠之蘇曰家先此刀久矣不服旣



備極諸刑竟誣服季荒潛使人懷刀往市其隣  
一童子識之曰此我家物也遂得賊而釋蘇永  
樂乙酉纂修大典命少師姚廣孝及尚書鄭賜  
監修而難其副乃以命季荒討論裁決人多服  
之庚寅坐失出人罪左遷兩淮鹽運使副未行  
改工部營繕主事躬勤治職不以崇庠爲意癸  
卯年卒性清素好學工詩冲澹優柔有陶韋之  
趣

虞伯益

公名謙字伯益鎮江金壇人也洪武乙亥由太學生擢刑部山東司郎中陞杭州知府永樂初召爲大理寺左少卿尋陞左副都御史命巡視淮揚旱災至則疏民所苦請發廩賑貸官爲贖還所賣男女爲奴婢者皆縱之復命督兩浙蘇松諸郡運賦建議丁多而糧最少者運北京丁多糧少次者運徐州丁糧俱中運南京淮安丁少糧多存畱本郡縣倉巡撫浙江察廉糾貪上

言十數事多見施行 仁宗皇帝卽位擢爲大理卿先是都察院論誑騙罪准洪武榜例梟首謙言比奉詔書自今准律斷罪誑騙在律當杖而流梟首非詔書意 上曰虞謙言是天津衛倉災焚糧數十萬石御史廉視還言主典者盜用多故縱火以自蓋追逮幾八百人不勝拷掠皆誣服論死者百餘人謙察其冤白于 上得減論凡法司及四方所上獄皆親閱之必求其平大辟尤致慎曰彼無憾斯我無憾矣有詔求

正言謙上七事其一論用人曰得人則治興非  
人則治隳人主之職在擇人而已其二論學校  
曰教育之本在師範不惟其備惟其人三曰都  
察院耳目綱紀之職用以激揚清濁者也今專  
使治獄非設官本意四曰廣儲蓄今國用空乏  
宜預爲備五曰北京八府之民困于養馬宜分  
給無馬郡縣以蘇圻內六曰鈔法不通由于出  
多而入少今宜多方收之而不輕出民艱于得  
鈔則自流通七曰京師多盜由于軍民雜處官

司不便約束今宜勅五城兵馬司立甲伍之法  
無分軍民使互相覺察一家有犯十家連坐能  
捕首者免其罪皆切中時弊謙儀觀甚偉瀟灑  
絕俗工詩所著有玉雪齋稿

梁用之

梁潛字用之弱冠文章議論馳騁先輩洪武丙子鄉試明年授四川蒼谿縣學訓導縣僻遠終歲無過賓而山水又可適潛暇則清流茂樹間吟咏自得用薦除廣東四會知縣縣有龍橋河世傳吏有廉平之政卽河水清自潛至訖去河水澄潔可鑑改陽江又改陽春永樂初詔修高廟實錄陞翰林修撰命以本官兼右春坊右贊善時修永樂大典召至四方儒學幾三千人

命太子少師姚廣孝禮部尚書鄭賜總之已賜  
卒遂舉潛而惰慢放肆者相與誣其過 上問  
具對 上曰梁潛言是抵造誣者罪 駕幸北  
京召赴行在十一年復扈從北京復北狩擇侍  
從監國之臣時翰林獨畱學士楊士奇以潛副  
之明年及於難矣潛善爲文詞理悠暢通顯而  
不爲險澁在翰林久流華衮推爲弗逮也有集  
若干卷

鄧士齊

公名林字士齊新會人也洪武丙子領鄉薦爲  
廣西貴縣教諭林素嗜學能爲古文章復長於  
詩歌自謂學詩於陶韋李杜學文於史漢韓柳  
學書於晉唐諸名家孝滿京師時大學士楊士  
奇祭酒李時勉閱其詩文相謂曰嶺南一代文  
人也暫畱史館修書尋出教南昌多有薦其學  
行者乃遷吏部驗封主事宣德四年三月以事  
忤旨謫居杭州林博記多才器識洪邁會論



侃侃杭士夫多從之爲湖山遊與布政使姚肇  
隱士夏誠諸人讌遊倡和仁和士人張震編集  
刊行曰湖山遊詠錄其爲人所重如此

唐亨仲

鄭孟宣

唐泰者閩縣人也字亨仲洪武二十六年舉於鄉明年擢進士第授行人歷浙江按察僉事陝西副使泰少善聲詩與同郡黃濟爲詩友其所著皆軼不傳所見善鳴集中

鄭定者閩縣人也字孟宣善擊劍工古篆行書陳友定辟爲記室友定敗鄭定浮海亡其交廣間久之稍還遂居長樂高皇帝末年徵授延平訓導歷齊府紀善國子助教著詩數卷號曰

澹齋集今軼不傳

方希直

公名孝孺字希直台州寧海人也父克勤國  
初守濟寧孝孺其仲子也始生之夕有木星墮  
于其所生而精敏絕倫雙瞳如電日讀書積寸  
爲文深醇雄健鄉人呼爲小韓子年十四侍父  
北遊齊魯間觀周公孔子廟慨然嘆曰使吾遊  
孔門顏閔縱未可幾及其餘若樊遲冉有輩豈  
讓之邪但世無孔子不得依歸耳弱冠從家謙  
遊同門多天下名士一旦盡出其下

文曰歐陽少師蘇長公姑置勿論其餘諸子與之角逐文場不知孰先孰後也然孝孺未視文藝恒以明王道聞異端爲已任時人以爲難朱復出也嘗卧病絕糧家人以告孝孺曰古人有三旬九食甑無儲粟者豈獨我哉洪武二十五年召見容止端整上喜謂皇太孫曰此莊士也當老其才以輔汝試靈芝甘露論稱旨擢漢中府學教授蜀獻王聞其賢聘爲世子師孝孺每見必以仁義道德之言陳于王前王嘉納

之名其讀書之廬曰正學蓋以聖賢待之也革  
除初年用交薦爲翰林侍讀入內閣備顧問寵  
任特隆 文廟登極欲詔天下以問姚廣孝曰  
孰可使代草對曰必方孝孺數召不往迫之斬  
袁而見命草詔曰有死而已遂就戮爲絕命詞  
曰天降亂離兮孰知其由奸臣得計兮謀國用  
猶忠臣發憤兮血淚交流以此徇君兮抑又何  
求嗚呼哀哉今庶不我尤宗族坐死者八百四  
十七人孝孺直諒剛毅尤篤人倫克勤之守濟

言本ノ外ニ  
寧常被誣謫戍江浦上書乞以身代不報宋濂  
歿于夔自漢中走蜀哭之其學得之家庭而淵  
源于伊洛文章類蘇氏而正論過之所著有遜  
志齋集

練子寧

公名安字子寧以字行臨江新淦人也父伯尚  
洪武間爲起居注以直言忤旨謫廣德州同知  
後遷臨江鎮安二府通判卒于官安少奇邁志  
操不凡遊邑庠與金幼孜友善常謂之曰子他  
日必爲良臣我必爲忠臣洪武甲子領鄉薦明  
年入對大廷極言今日用人徇其名而不求其  
實以小善而遽進之以小過而遽戮之因歷陳  
古人教養任用之道言甚剴切高皇帝嘉之



擢第二名進士及第授翰林院修撰以母喪去  
服闋陞吏部左侍郎進賢退不肖多所建白華  
除間初年與方孝孺等特見信用遷左副都御  
史會御史府成改御史大夫靖難師起安極論  
李景隆奸邪不忠一日於朝班中執景隆數其  
罪請誅之不聽安憤激稽首請先伏誅遂罷朝  
師旣渡淮靖江府直史蕭用道衡府紀善周是  
修上書論大計指斥用事者過惡書下羣臣及  
兩人議用事者怒盛氣以詬兩人安言國事至

此尚不容人言邪 文皇帝既卽位有詔治奸  
黨安不屈族誅姻親被逮戍邊者甚衆惟吉水  
錢氏得免及錢習禮仕于朝爲鄉人所持恒懷  
不安以告少保楊榮乘間以聞 文廟曰使練  
子寧今日在此朕固當用之况習禮乎後同知  
王佐輯安遺文曰金川玉屑集提學副使李夢  
陽始命有司梓之立金川書院以祀安父子名  
其堂曰浩然而刻石記焉

## 汪朝宗

汪右丞詩氣骨雄渾語意爽朗卓然可傳名廣  
洋字朝宗高郵州人名乃高皇所賜平生善  
篆隸大書尤工詩歌故有集宋學士序其首稱  
爲臺閣之文信矣公嘗從上征討有軍諮功  
四叅行省有藩翰功再入中書有翊贊功後又  
進爵柱國封伯忠勤可謂人臣之極詩文殆其  
餘也其後竟坐與胡惟庸同相不獲令終傳者  
謂其寬和自守與姦同處而不能去以爲相才

不足豈其然耶然而踈宕則實有之蓋於詩徵  
焉

許士修

許士修集五卷方正學先生序其首先先生又嘗  
爲撰墓文其略曰夫台方孝孺有篤志尚德之  
友曰許君繼字士修言必出乎正動必由乎禮  
趨舍取予咸則乎古之君子其精思力學以求  
道德性命之蘊汲汲若或失之有得于心沛然  
自樂不以貧賤患難惑其志喜爲詩其高妙處  
有魏晉人格韻別自號觀樂生蓋非近世詩人  
所及也使假以年所至當卓越過人而年僅三

言才公傳卷二  
十有七以洪武十七年正月日卒

解大紳

解縉字大紳吉水人 高帝時舉進士爲翰林庶吉士授監察御史罷歸里建文初戊河州召爲待詔 太宗下南京入內閣預機務遷文淵閣大學士兼翰林院學士出叅議交趾下獄死鳳洲筆記云學士黃岡首叅玉堂名俊詩家者流寰海推價然多對客之揮頗謝撚髭之苦又李文達公曰 國初以才名者如王子充方孝孺輩不徒以文章名也兼節義而有之千古莫

及已至如解縉文學書札冠絕一時其爲人曠  
易無城府喜薦引士然少慎擇且所行多任情  
忽略故及於罪嘗讀其洪武時論時政有曰  
陛下進人不擇於賢否授職不量於輕重又曰  
陛下誠信有間用刑太繁每多自悔之時輒  
有無及之嘆又曰與師取實真僞莫明神仙徵  
應誕謾莫信祀天宜復掃地之規尊祖宜備七  
廟之制乞簡用忠良勿任意喜怒生殺縷縷  
餘言無不切中 帝心者及 文皇登極首選



行誼才識之士而於縉尤注意焉日侍左右  
顧問一日文皇與論廷臣縉書十人以對如  
蹇義夏原吉李至剛黃福諸人皆從而優劣之  
既奏文皇以授仁宗曰如李至剛已驗之  
矣餘徐俟之文皇又與縉議交趾議建儲對  
不稱旨是以終棄而不用厥後仁宗稱其  
論有定見宣宗時交趾叛漢王果反悉如縉  
言嗟夫縉惟不言言必有中曾謂狂士而能若  
是哉特其耽詩文娛山水有以來讒邪之口不

知此遷客之常態不足爲縉病矣語云翠以羽  
亾身蚌以珠破腹女惡蛾眉士惡多才有以也  
使縉畱 仁廟時必有事業過人者而卒不獲  
大用遭讒幽囚以死可勝惜哉

## 陳景明

陳亮者長樂人也字景明故元儒生也其學無所不窺 明興 二祖皇帝時累詔罷縣徵遺逸或推轂亮亮曰昔唐堯在上下有箕穎吾投迹明時遊戲泉石間吾志慊矣吾豈願仕哉遂掉頭不出作讀陳搏傳詩以見其志山中爲小樓號曰儲玉購四方名書藏之又作草屋滄洲中與名士王恭高棟爲文酒日過從暇則汎閩江歷名山投上方蘭若尋僧問偈意豁如也時

時往還三山中爲九老社以此自終亮爲詩冲  
澹悠然有陶孟之風

王中美

王褒閩縣人也字中美博極羣書少有詩名洪武中以明經貢入成均頃之擢舉應天龍歷瑞州長沙兩郡博士遷永豐尹褒治永豐課農桑興儒學縣無逋事永樂初年朝京師考上最已而以文學表修高廟實錄遂擢褒爲翰林修撰及修永樂大典勅充總裁官褒性剛正居家以孝友聞與人交敬久而不衰人有善汲汲然獎進之閩志列在儒行傳中有集若干卷

孫伯融

瞿宗吉

劉汝弼

劉孟熙

孫炎字伯融句容人事

高皇帝爲幕僚授中

書都事遷左司郎中總制處州軍府陷賊不屈  
死之鳳洲筆記云左司俠氣驚發辯辭虹矯疆  
圍之寄援分以沒今作歌詩十不一二存者然  
頗跌宕雄逸青鳳吉光之裘片羽千金藏龍如  
意之珠一照累乘奚啻多哉

瞿祐字宗吉錢塘人累官周王左長史雖長於  
填詞而詩亦清新可觀

劉公名仔肩字汝弼鄱陽人

公名績字孟熙山陰人鳳洲筆記云仔肩清麗  
頗識選體績更煜煜妍雅法長吉歌行

陳公甫

公名獻章字公甫廣東新會人也身長八尺目光如星右臉有七黑子生之前夕太夫人夢白龍入室其光如晝幼秉奇悟正統丁卯中鄉試戊辰辛未會試不第聞江西吳與弼講學於臨川遂棄其學而學焉丁亥游太學祭酒邢讓試獻章和楊龜山此日不再得詩讓覽之驚曰龜山不如也爲颺言於朝以爲真儒復出由是名振京師羅倫章懋莊梟賀欽輩皆與遊欽時爲



給事中聞獻章論議卽日解官去獻章歸四方  
學者日益衆江西布政陳煒脩復白鹿洞書院  
成聘獻章主之不就壬寅以布政使彭韶都御  
史朱英薦赴京師召試吏部辭疾不往上疏乞  
歸養授翰林院檢討上表謝不辭而去教人以  
主敬爲先或勸之著書不答弘治庚申卒所著  
有白沙集

楊文貞

公名士奇原名寓以字行江西泰和人也少孤  
好學郡縣交舉爲學官皆不就革除間翰林脩  
撰王叔英薦之徵入翰林任編纂同事者皆天  
下宿儒咸推讓士奇命吏部尚書張統考第其  
文以官之士奇第一奏授齊府審理副 文皇  
帝卽位擢編脩時方開內閣於東角門內命解  
縉黃淮胡廣胡儼楊榮金幼孜及士奇七人處  
其中典機密尋陞侍講 仁宗皇帝立爲皇太

子公兼左春坊左中允嘗於文華殿呈大學講義 上覽畢曰先儒謂堯典克明峻德章一部大學皆具士奇對曰二帝三王所以脩身施之家國天下者皆大學之道 上曰孟子道性善言必稱堯舜講說之際必以古爲證庶幾易入皇太子嘗閱真德秀所輯文章正宗喜之士奇曰德秀真儒其著大學衍義尤有益君臣皆不可不知 皇太子卽取視命翻刻焉廣東布政徐奇朝京師以嶺南藤簞諸物將遺廷臣

得其單日以進 上閱視無士奇名乃獨召士  
奇問故將以私交罪之士奇曰奇自都給事中  
受命赴廣廷臣皆作詩文贈之故有此餽臣不  
與名者當時病未有作耳且受否未可知物甚  
多留無他 上意解命燬其目一無所問陞左

諭德兼侍讀六年冬詔巡狩北京命士奇視艸  
上稱善又命與諸尚書觀之明年 駕幸北  
京 皇太子監國命士奇同蹇義等輔導贊善  
王汝玉每以詩法進 皇太子以問士奇對曰

詩以言志明良喜起之歌南薰之詩可見舜之  
志漢高祖大風唐太宗雪恥除兇之作所尚者  
霸力非王道漢武秋風辭志氣已衰若隋煬帝  
陳後主皆淫靡不足道殿下明經講道之暇娛  
意文章兩漢詔令皆可觀非但文辭高古亦可  
裨益治道詩非所急也 皇太子喜讀易命取  
朱子本義纂其要以進名周易直指士奇因進  
曰易固爲卜筮作然修齊治平之道悉具請編  
輯以備觀覽書成名曰周易大義九年

南京一日召問東宮果何如以孝敬對使言其實對曰有事宗廟祭品祭器皆親閱每進御用物皆親閱封識車駕北征不敢寧居恒日中昃始食駕還而後卽安 上曰此子道當然士奇曰古聖賢亦皆盡其當然者耳 上悅十二年正旦日食先是 上以問羣臣曰正旦日食百官行賀禮乎禮部尚書呂震曰日食與朝賀不同時當賀侍郎儀智曰終然同日宜免賀士奇曰日食天變之大者宋仁宗時元旦日食富弼

請罷宴徹樂宰相呂夷簡不從弼曰萬一契丹行之爲中國羞後有還自契丹者言虜是日罷宴仁宗深悔今誠宜免賀上曰君子愛人以德士奇與智言是也遂免賀及宴十四年上聞高煦有異志欲發其事疑未決獨召問士奇曰昨問蹇義漢府事對曰不知若朕未知爾輩疑有離間不敢言今朕既知之矣爾言之何害士奇對曰臣與義事東宮外人無敢與臣等言者但漢府始封雲南不肯行改青州又不肯

今知將遷都北京惟欲畱守南京天下皆疑其  
心惟陛下善處之使早有定所以全父子之恩  
是年冬周王楚王來朝謁 孝陵 上命 皇  
太子皇太孫及諸皇孫陪謁以問翰林諸臣拜  
位當何如士奇對曰二王尊屬當分列居前東  
宮稍後居中皇太孫又後亦居中諸皇孫與太  
孫同班而分列兩傍 上出片楮所書位次與  
士奇言合 仁廟卽位自左春坊大學士進禮  
部侍郎兼華蓋殿大學士尋陞少保進少傅尚



書呂震言於上曰今喪服已踰二十七日請如太祖倣漢制易吉服上未有答震退徧語羣臣明旦易吉士奇曰今未可比此例蓋洪武中有遺詔且仁孝皇后崩太宗皇帝衰服後仍素衣冠經帶者數月今上于皇考可遽卽吉乎明旦上素冠麻衣麻經出視朝文臣惟學士武臣惟英國公張輔如上所服旣罷朝上諭左右大臣曰呂震昨奏當易服將宮在殯吾豈忍易士奇所執是也張輔知禮

臣乃不及也洪熙元年命兼兵部尚書請辭俸  
許之上監國時御史舒仲成常以事忤旨後  
陞爲湖廣按察副使因他事逮治士奇上疏曰  
向來小人得罪者多陛下卽位皆宥之今追  
理仲成卽詔書不信漢景帝爲太子召衛綰不  
赴卽位進用綰前史黷之上喜卽命罷治仲  
成大理少卿弋謙數言事過激上頗厭之因  
免謙朝士奇進曰陛下有詔求言言不當者  
不罪今謙因言取咎人將謂朝廷不能容直言

遂令朝如常 上念士奇匡輔之益賜璽書嘉

勞且製楊貞一印賜之 上嘗論科舉之弊曰

北方學問不逮南人士奇曰長材大器多出北

方如取百人則南六十北四十南北人材皆就

用矣命與禮部定議未上而 宮車晏駕 宣

廟卽位遂行之元年高煦反 上親征罪人旣

得尚書陳山請移師彰德襲執趙王則永無憂

矣士奇不可曰 太宗皇帝惟三子今 上惟

二叔其有罪者不可怨無罪者宜加厚庶幾卽

慰 皇祖之靈乃命廣平侯表容都御史劉觀  
持軍書往諭卽獻護衛上表謝恩而言者頓息  
二年安南黎利乞立陳氏後 上召士奇與楊  
榮謀之榮曰永樂中費數萬人命得此至今勞  
者未息困者未蘇因其請而與之便士奇曰榮  
言當從數年來兵民困於交趾極矣漢棄珠厓  
前史以爲美願勿疑 上意遂決七年建議方  
面及郡守請令京官三品以上及布政按察司  
薦舉吏部審其可用奏受以官後犯贓罪併坐

舉者軍民中有才行卓異及智勇精於武畧者  
亦宜察舉唐虞之世罰弗及嗣今極刑之家有  
賢子弟例不許進用非鯀殛禹興之道也 上  
皆從之正統初數上書言軍國大計多見采聽  
進少師柱國八年卒年八十贈太師謚文貞公  
立朝四十年公正不阿論事必當大體常扶君  
子而抑小人總裁 三朝實錄是是非非悉徵  
諸實每曰天下萬世之事當以天下萬世之心  
處之富於文學所著有三朝聖諭錄及東里文集

曾襄敏

公名棨字子啓永豐人永樂二年進士第一人  
授脩撰上命解縉選進士進學文淵閣公及編  
脩周述周孟簡進士楊相劉子欽彭汝器王英  
王直余鼎章敞王訓柴廣敬王道熊直陳敬宗  
沈升洪順章朴余學夔羅汝敬盧翰湯流李時  
勉段民倪繼哲表天祿吳紳楊勉被選名翰林  
庶吉士入見上諭曰人須立志遠大不可安  
於小成爲學必造道德之微具體用之全爲文

必並驅班馬韓歐如此未有不成者爾等勉之  
庶將來皆得爾用公學問日進 上時召試迅  
筆千言立就詞理皆到 上屢摘羣書隱僻事  
問公悉能對以故喜公公名聞天下會脩永樂  
大典爲副總裁陞侍講數侍燕間應制賦詩有  
薦文士者必問得如曾槩否內艱起復扈從邑  
人坐奸黨事詞及公 上特原之後陞侍讀學  
士脩天下郡縣志爲副總裁獻陵卽位陞左春  
坊大學士從景陵南京還陞少詹事公預脩

三朝實錄再扈北巡三考會試爲文章如源泉  
混混沛然千里狀寫之工極其天趣工書法草  
書雄放有晉人風自解胡後獨步當世儀貌魁  
偉襟度坦夷而神清洒落能飲酒善談論平生  
以及物爲心使之臨民必有所濟惜仕三十年  
徒以文學自見云卒年六十有一贈禮部侍郎  
謚襄敏有巢睫集余所有者尚少五言律及查  
皇明珠玉等集公五言律實與七言律伯仲也



魏文靖

公名驥字仲房浙江蕭山人也永樂三年舉鄉試爲松江府學訓導勵志作人諸生宿號者携茶往視之夜分則以粥有誦讀者輒供之九載滿去諸生詣闕請留復任三年兩考江西鄉試十七年吏部尚書師達薦陞南京太常博士侍昭皇帝北上畱行在與聞大事宣德元年陞行在考功員外郎轉南京太常少卿三考會試正統三年召試行在吏部左侍郎踰年實授

太監王振奴視諸公卿獨禮驥呼先生贊見惟一帕振不較也八年以老薌調禮部又薌改南京吏部郎中殷時暴亡親往弔以已木斂之其子請償直拒不受戊辰進尚書已巳率諸司條陳破虜安民之策景泰改元年七十七請老至京師大學士陳循驥所取士也請曰先生雖位冢宰然未嘗立朝願少待事在吾輩而已驥不從退語人曰渠將朝廷事爲一已事邪竟致仕去 純皇帝卽位進階榮祿大夫家居二十餘

年布袍糲飮不治生業成化七年卒年九十八  
御史梁昉言驥耆德請如漢故事優禮之詔遣  
行人存問賜羊酒有司月給米三石勅至驥已  
卒卒之前一夕大星隕舍傍遺言辭卹典從之  
謚文靖驥端厚慎約好別白君子小人老年事  
其兄教諭驥甚謹好學不厭老而彌篤所著有  
南齋集松江志水利切要理學正義等書

王安中

王恭字安中閩縣人也環閩皆山而恭家故貧則爲樵往來羣山中自稱曰皆山樵者恭善爲詩援筆纏纏千言立就 文皇帝四年有司以儒士薦強起至京師年六十餘老矣 勅脩永樂大典同郡王偁爲翰林檢討同纂脩戲謂恭曰君無以會稽章綬故來耶恭從容笑謝曰吾山中斧柯幸自無恙君無深誚我爲矣居三年大典成試詩高第授翰林典籍居頃之投牒歸

著詩數十卷號曰白雲樵唱其在金陵曰鳳臺  
清嘯歸田曰草澤狂歌軼不盡傳廬陵解縉稱  
其布衣蕭然不慕寵榮強之而起朝起鳳鳴此  
足以梟恭矣

周微

黃玄之

周玄字微之閩縣人也永樂中以文學徵拜祠  
部尚書郎其爲詩瓌奇託興悠遠嘗賦揭天謠  
若干篇論者謂其怪如長吉云生平多所論著  
率軼不傳維時蓋經義之士嚮風而雅道闕矣  
黃玄字玄之侯官人也其初本將樂人林子羽  
爲將樂學官時黃玄爲弟子子羽雅重黃玄嘗  
爲詩稱青衿二十徒達者惟黃玄云而黃玄益  
嚴事子羽及子羽棄官歸黃玄挈妻子入閩中

終身師事之已而以歲貢入成均老矣竟授泉州訓導卒著詩若干卷皆軼不傳

李昌祺

公名禎字昌祺僑菴白衣山人運甓居士其號也廬陵人父伯夔力學工詩名聞當時禎成童屬對賦詩語出驚人一時才俊若禮部侍郎曾棨輩相與頡頏聲名不相上下舉永樂癸未進士翰林庶吉士會脩永樂大禮部奉 詔選中外文學之士禎在選中例凡經傳子史下及稗官小說悉在收錄同事者推其該博擢禮部主客司郎中尚書呂震有巧佞才狼復自用僚



佐少忤其意輒中傷之而待禎特異始終不少  
衰 駕幸北京洪熙以 皇太子監國兩命權  
知部事行在轍奏藩憲員闕永樂命簡兩京朝  
臣有才望者補之於時舉禎等若干人應詔宴  
於禮部予道里費至卽陞爲廣西左布政使尋  
丁外艱去先是河南連歲寒蝗民多死徙永樂  
震怒被災郡縣有司不以上聞者悉逮寘於法  
思得人以撫安其民改禎往泣河南旣至宣布  
主恩䟽滯舉救災恤憫下譟繩豪猾去

殘居數月政化大行丁內艱歸河南薦饑本司  
累奏起禎治之宣德命奪情乘傳赴官爲治如  
初勤勞倍之因感風疾往往增劇不待引年堅  
乞致仕旣歸而先廬僅庇風雨服食清約如寒  
士伏臘不充處之裕如居雖密邇近城足迹未  
嘗至公府守長於政務有所咨決極言無隱病  
間輒書不去手吟咏自娛疾革遺訓二子以力  
學脩身餘無他語儵然而逝所著有集若干卷

聶壽卿

公名大年世爲撫州臨川人父同文洪武中進士爲翰林侍書尋改中書舍人成祖至京師時盛暑以迎鑾暍死後五日乃生大年大年少穎悟讀書日記數千文通詩書二經於諸子史無不讀尤篤意古文及晉唐人詩書法歐陽趙松雪薦起爲仁和訓導藩憲大臣與一時達官顯人過杭者皆禮重之而大年之文章傳於遠邇母九十奉柩歸葬哀感行路鄉邑耆老列言

言利人先生集卷二  
母賢行足以勵風俗而子又克孝如此 詔旌  
表其門服闋分教常州府學滿九載陞仁和教  
諭賓興之歲諸藩省請典文衡者聘幣交走其  
門而多以後至不能得爲憾凡所經歷遇佳山  
水及古人遺跡必見諸賦咏聯爲大卷藏於家  
景泰六年秋朝廷有史事徵諸翰林將用之而  
大年以疾退卒所著有冷齋集

夏仲昭

公名景字仲昭以經術進而書法特妙由庶吉  
士改中書舍人 文廟嘗試其書第一特命書  
諸宮殿榜遂 賜第宅免朝叅眷顧極隆初景  
字作昶 上曰日豈可從傍宜加永上遂爲更  
定後遷考功主事正統中出知瑞州入爲太常  
少卿進卿致仕景爲政平易居家孝友而風流  
文雅有高人之致詩詞清麗尤工畫竹石擅名  
天下至於朝鮮日本諸國皆以金購之凡景多

藝能人傳其亦長吟咏

于肅愍

公名謙字廷益錢塘人永樂十九年進士宣德  
元年授御史從討漢庶人上命數庶人罪辭嚴  
義正庶人流汗伏地上喜思用公巡撫江西  
平反冤獄五年山西河南災上親書公名陞  
行在兵部右侍郎巡撫二省公問民疾苦百弊  
湔剔馬政河防民租軍賦一經規畫遂爲成式  
正統元年轉左侍郎十一年薦叅政孫原貞王  
直自代降大理左少卿兩省人赴闕乞畱復公

巡撫凡歷十八年十二年復右侍郎還部十四  
年秋虜也先入寇上欲親征公與兵部尚書  
鄭埜力言不可不聽師駐狼山上北狩京師  
大震章皇后立郕王監國臺諫廷劾王振監國  
有未處分馬順附振衆怒擊之廷中大譁賴公  
鎮定卽陞兵部尚書加太子少保時內外注視  
倚公安危調兵爲禦虜城守計是年九月章皇  
后以皇太子沖年郕王親宣宗子年長宜嗣大  
統卽皇帝位遵尊上爲太上皇帝明



元景泰時三營精銳盡簡征行畱者皆老弱公  
見上泣曰虜賊將長驅深入不可不預計宜  
急遣官募義勇集民夫更漕卒練神機等營經  
理粗定十月朔喜寧導也先謾上皇還京五

日入紫荊京師戒嚴侍講徐珵妄言占象倡議  
南遷二三大臣依違其間公慟哭言京師天下  
根本郊廟社稷陵寢百官萬姓公私積聚皆在  
一動則大勢盡去宋事可鑒敢言南遷者衆其  
誅之羣心始定公奏用王通楊善守京城孫堂

衛穎分兵出戰監以王竑葉盛等官石亨楊洪  
柳溥爲總兵盡移郭外人入城散通州糧公率  
先士卒躬環甲冑以恩義諭感激六軍十一日  
也先擁衆至城下公及亨等統兵出禦虜見我  
師堅不可撼喜寧噤也先邀大臣及公出議兵  
索金帛萬萬計廷前莫決公曰本兵知有軍事  
他非所聞卽出德勝門外閉門對壘約戰以  
上皇在虜未敢動已諜知 上皇西移我發大  
砲擊虜死者萬計也先大沮遁去論功加少保

總督軍務如故公辭不允景泰元年二月公言  
除喜寧也先始悔禍果遣使請奉 上皇還京

上勅公防護京城且議通使羣臣顧望不能  
決公曰天位已定誰復異議惟君臣大義兄弟  
至情自當遣使奉迎 上喜從公言九月 上

皇至京師居南宮三年薦王忠肅公自遼東召  
還院是年五月立懷獻太子加太子太傅先是  
也先犯京師脫脫不花寇遼東不樂出寇陝西  
浙江葉宗畱福建鄧茂七廣東革肅養各擁衆

數萬僭號攻城訛言萬端變在呼吸公內固京  
師外籌邊鎮防衛陵寢散遣降胡抗控漕渠開  
鎮臨清收復獨石八城堡仍畱貴州藩臬條畫  
立奏動中機宜僚屬受成相顧驚服胡虜款戢  
羣盜悉平口不言功益自斂飭上推誠倚任  
獨秉朝綱文武大臣面酬進退官庭密務指膝  
調停清廉方正一錢不私力遜賜第止宿直房  
旁無姬妾鄉廬數椽僅蔽風雨薄田幾畝纔供  
饘粥食無兼味衣無絮帛大璫舒良及亨等

憚公不敢撓法相忤亨忌公屢辭兵柄公亦辭  
總督避亨公嘗卧病中官更番來視賜上供取  
竹瀝以和藥或言柄用太過上意益堅羣猜  
遂起怨謗益興上病時上皇出南內復位亨  
以奪門爲功誣王文與太監王誠及公意欲盜  
符金迎立外藩都御史蕭維禎恨王文排已得  
先入內閣又恨公每抑已故攘臂欲殺公奏公  
謀反當族徐有貞從上旁言不殺謙今日之  
事何名公自知功高隙深廷訊不復自辨遇害

時年六十籍其家子冕成龍門公死之日天日  
驟變陰霾蔽空思功悼枉四海一詞章皇后嗟  
嘆累日茂陵卽位赦冕還公沒產成化二年復  
公官遣官致祭弘治二年特贈太傅謚肅愍鳳  
洲筆記云少保負穎異之才蓄經綸之識詩如  
河朔少年兒無論風雅頗自奕奕快爽

李文達

公名賢字原德鄧州人宣德八年進士才藝有  
名沉潛好學 裕陵初上疏言帝王之道理一  
分殊愛有差等乞減黻官月俸正統元年授驗  
封主事請新太學再陞考功文選郎中十四年  
扈駕土木還 景泰初立上正本十策二年議  
禦虜長策公請用車戰是年冬陞兵部右侍郎  
明年考察四川諸吏又明年還改戶部上言也  
先包藏禍心今聽其講和實非長策乞勅邊將

練兵觀隙於少保壯其言五年入吏部上人君  
鑑古錄天順元年入內閣兼翰林學士山東饑  
請發內帑三十萬石賑之時石曹奸橫上密  
諭輔臣抑其干請會御史楊瑄劾二人上欲  
大用瑄二凶意出內閣哭訴上前上不得已下  
武功伯及公詔獄是日大風拔木上悟釋公  
調福建叅政瀕辭上顧王勦改吏部左侍郎  
學士踰月進尚書二年領春坊事三年亨坐誅  
上問公迎復事對曰此輩貪富貴非爲社稷



計萬一景泰先覺柰何天下人心歸嚮陛下  
以正統十數年間節用愛人與民休息今爲此  
輩十壞七八上竦然詔革奪門功賜公第五  
年虜孛來入雲中塞至鴈門明年虜又入河西  
塞公薦將帥顏彪等調兵食畫上五事壽邊江  
南北大水請下寬卹之詔加太子少保七年

上足疾力請出郊壇行禮錦衣門達寵而橫訐  
臨川弋陽二王陰事訊無左驗公請戒緝事者  
達又誣表彬下彬獄有疏雪彬者達又并誣疏

出公公乞罷不允未幾達謫戍上不豫名傳  
位太子八年正月茂陵卽位進少保華蓋殿  
大學士會災異屢見請出宮人簡近習成化二  
年外艱詔起復公辭不允脩撰羅倫論公謫倫  
官公上道中所見軍民利病八事又言祖宗  
創業垂統宮禁甚嚴內外閉密內帑充積無得  
妄費遊有嘗所無起離宮賜有常度無開倖穴  
願垂省覽是年冬卒贈太師謚文達公恭莊端  
重練達政務不屑爲小廉曲謹政務在九卿議

擬不相侵奪薦用耿九疇軒輓年富王竑李夢  
程信姚夔崔恭白圭許貴顏彪馮宗諸大吏文  
武皆得其人他若止汪妃之殉葬出建庶人吳  
庶人於中都公預力焉其著作作明爽有致

劉文安

公名定之字主靜江西永新人也幼強記天資  
絕人父髦日授書千言禁爲文定之輒私作一  
日病父卽臥所得定之所作祀竈文及詩大驚  
然不口許也自是稍敢以文辭進每進輒斥之  
他日更進髦曰此子有八面受敵之才宣德乙  
卯中鄉試丙寅會試第一廷試第三授翰林編  
修正統己未京師大水詔求直言定之上十事  
其一言命令宜出至公賞罰必信其二言公卿

侍從宜數名見賜以清問因以觀其才能察其術而進退之其三言降胡近處畿甸宜移之

南中其四言宜出京官使任郡縣其五言宜倣唐制令朝官陞遷者舉賢良自代其六言武官子孫宜習韜畧其七言守令宜詳加考課其八言宜鋤豪富以卹貧困其九言廷臣憂宜令終制其十言宜遏僧尼奏畱中不下己巳歲景皇帝登極定之時爲侍講上言十事一戰陣宜倣古減火鎗增刀斧二守禦宜繕亭障

隨三簡用使臣四遷移降胡五兵士月錢六貳  
守令霍民七選將八武臣濫爵九總攬權綱十  
經筵進學 上嘉納焉尋拜洗馬壬申北虜遣  
使來朝固邀報禮言官以爲宜絕之勿往報而  
執政者恐絕之則開邊釁議不決定之上䟽請  
暫遣使以羈縻之使我得益修內治倘我以和  
往彼以惡來則足以增我師之直氣其䟽累千  
百言曲盡事理云成化間歷任禮部左侍郎入  
內閣再進密䟽皆國家大計上元日中使傳

旨命製詩却立以俟定之據案筆不停揮立賦  
七言四句詩百首以進其學自經史下至雜說  
方技釋老之書無所不窺文章出蘇氏所著十  
科策業舉子者人誦焉卒贈禮部尚書謚文安

徐武功

公名有貞初名理字元玉吳人也宣德甲寅進士改庶吉士授翰林編修益肆力用世之學凡天官輿地刑獄軍陳河渠方略靡不探究宣皇崩與脩實錄尋詔脩玉牒進侍講正統初上言承平久宜修邊防上嘉納已巳京師戒嚴分遣文臣守要害地有貞得河南假便宜行事作鎮彰德民間變卒竄匿山谷招復業遂糾義兵爲京師聲援京師戒嚴召還景泰元年充經



廷講官二年陞右諭德兼侍講會河決張秋沙  
灣先是治者率築其決水大至築輒壞更七年  
績用弗成詔有貞左僉都御史往治三年而  
功乃成擢左副都御史七年 景皇帝大漸都  
督張輓張軌武清侯石亨太監曹吉祥共謀復  
辟以問大學士許彬彬曰此社稷功也彬耄矣  
無能爲也盍謀之徐元玉其人經濟才也天順  
元年正月己卯夜亨軌就問計貞曰 太上皇  
北狩以赤子故非遊畋也今天下無離心

以復辟此天人同符也因互陳籌畫亨軌去越  
二日辛巳夜復來有貞升屋覽乾文亟下曰時  
在今夕不可失也亨軌唯唯去有貞焚香祝天  
訣家人曰事成社稷之福不成家族之禍吾去  
矣歸耶人不歸鬼矣遂潛會亨軌輓吉祥及鴻  
臚卿楊善盡收諸城門鑰夜四鼓開皇城門納  
兵直官衛士咸錯愕不知所爲兵盡入復鎖諸  
門匿鑰水竇中進薄南宮城門鐵錮牢密扣之  
不應有貞命壯士踰門入與外兵合毀墉墉壞

門啓亨等入 太上皇燭下獨出亨等俯伏合  
聲請 陛下登位有貞命兵士舉輿來兵士咸  
顫栗莫能舉有貞手挽之前遂掖 太上皇登  
輿顧問有貞曰卿爲誰對曰都御史臣徐有貞  
太上皇遂升奉天殿悉開諸城門久之辨色  
鼓鐘鳴羣臣入及朝始知爲 太上皇咸驚喜  
羣情始安卽日陞翰林院學士掌文淵閣事尋  
陞兵部尚書進柱國封武功伯賜鐵券文多不  
載一日數召對使者絡繹于道 上時仄席以

伺恩寵隆渥有貞感知遇以身任天下條奏切無復顧慮施行若流一時威權震赫百僚畏忌而曹石等始嫉之初朝廷批旨皆閣臣調進旨藁畱閣中號絲綸簿後中官收簿司禮監有貞請復故事還簿於閣宦者權益衰怨有貞而曹石等私謂多不從凡所陳請復諫止節縮由是益恚怒御史楊瑄劾曹石奪民田上曲宥之乃曹石疑有貞所使也愈憾有貞數巧辭激怒上殊不爲動上時時屏去人與有貞語

中官伏人竊聽之以告 上上曰何自知之對

曰此有貞宣言之 上大驚始疑久之讒益深

上愈惡有貞亨吉祥因竊造封事誹毀朝政

假給事中李秉彝名上之時秉彝以丁憂去逮

至拷訊死曹石因言此徐有貞怨望使所親馬

士權等爲此而假託以滅口耳遂捕有貞并士

權等下獄雜訊之 上猶念功出爲廣東左叅

政乃曹石必欲殺之復上急變追下詔獄備極

拷掠竟亡狀士權曰今欲吾等何所承邪刑

曰徐有貞謀逆汝等同謀耳士權大呼曰徐有貞欲使今

皇帝爲堯舜之君今百姓爲堯舜

之民如此而已不知其他獄久不成適承天門

災上寤出有貞安置金齒爲民至滇寓僧舍

中日讀易而已居三年詔還田里居家杜門謝

客曹石敗始出遊湖山以自娛自稱天全居士

憲廟卽位詔賜冠帶閒住有貞之學自經傳

子史稗虞百氏天文地理釋老醫卜下至星祿

風角奇遁異術無所不通文章雄奇詩效李白

詞林人物考

卷二

五十九

書法出率更南宮所著有史斷及文集

吳文恪

公名訥字敏德直隸常熟人也父遵道沅陵縣主簿誣繫京師乞身代事未白而父沒治喪以禮不用浮屠法以學行聲聞江東郡縣薦爲教官不就永樂末舉醫生至南京所居鄰有嫠婦少而美夜穿壁將奔之訥亟排戶冒大雨出旦日卽遷他所時 仁皇帝監國命教諸功臣子弟拜監察御史巡按貴州還三司遣人以黃金百兩追送至夔府訥不啓封就題其上還之詩



曰蕭蕭行李向東還要過前途最險灘若有賊  
私并土物任教沉在碧波間其廉而不激多此  
類歷陞南京都察院右僉都左副都御史致仕  
廉直敬慎持正不撓爲文根據義理而本於六  
經作文章辨行於世天順元年卒年八十六謚  
文恪

周文安

卞華伯

公名洪謨字堯弼長寧人正統十年進士祖父  
皆儒官有學行公少有奇質歷官翰林官坊專  
心問學爲文詞簡直有理致不爲奇澁語而言  
意宛轉可愛尤熟國家典故議論建白緣飭吏  
事應對賓客出入經史初在翰林卽勸裕陵  
勤經筵以明聖學謹內治以敦政本未幾上時  
政十二事條蜀寇防禦便宜成化初爲祭酒兩  
國子表率生徒規閑整整又上言祀禮儲蓄省

刑減役薄稅禦虜撫夷等十事我朝尊崇孔子  
冕服循前代用天子制而禮樂不稱封號不加  
公以爲闕典宜更議下禮部鄒尚書不可茂陵  
用公議增籩豆十二舞八佾十四年陞禮部右  
侍郎尋轉左十六年陞尚書二十三年加太子  
少保公又言書蔡氏傳璿璣玉衡非是以故占  
步不合乞更定西番烏思藏者合諸族入貢徼  
賞踰舊額歲益至三四千人河西諸番又詭自  
思藏族益不可詰公請視海中倭夷給與符

十道每貢書貢使名及貢物符上識以舊賜金  
印至闕驗是納否斥去成化末月當食不食衆  
議宜賀公言陰盛故不可賀竟不賀弘治元年  
致仕歸聞有虜驚力疾上安中國禦四夷十事  
又三年卒謚文安

卞公名榮字華伯江陰人正統乙丑進士歷官  
戶部郎中能爲古歌詩邸舍卷冊填委公退泚  
筆頃刻輒數十篇文章汪洋停蓄隱然名動吳  
越間性曠達逍遙徜徉殆三十年以老疾卒

葉文莊

公名盛字與中蘇之崑山人也正統乙丑進士授兵科給事中己巳英廟蒙塵盛廷劾驕將楊俊請誅扈從失律者然後選將練兵以復不共戴天之讐十月也先薄京城請罷內府庫匠悉事征操復請犒師遣散卒取軍器於天津以弭外援形勢四日中疏凡八上動合機宜虜退盛言賞罰者爲治之要務而今日爲尤急從之進都給事中大臣有奏畱邊將守京師者盛言

言木ノ外ニ  
卷二

今日之事邊關爲急往者獨石馬營不棄則六  
師何以陷土木紫荆白羊不破則騎虜何以薄  
都城苟邊防不固京師雖守不過保九門耳其  
如陵寢郊廟田里之民何宜遣將固守宣府居  
庸便景泰元年八月也先奉 太上皇還京師  
將抵居庸千戶龔遂榮牒言 上皇之出爲宗  
社計今都人聞 駕還皆踴躍迎復之禮宜厚  
主上當避位固辭而後受之乃可不然或貽  
譏千載竄其名投之野盛言於大臣宜亟封是

以見朝野同情或可感動。上心都御史王文以匿名書爲沮乃自奏之。景皇帝頗事畋遊盛請復。祖宗午朝故事從之三年遷山西右叅政協贊獨石等處軍務盛以獨石馬營八城殘破不可守乃條八事以進命施行焉八城旣復乃立學置醫設義塚增煖鋪請官銀五千兩買牛千頭摘戍卒不任戰者驅之耕歲課其餘糧以爲軍中費丁外艱去天順二年召爲右僉都御史巡撫兩廣乞終喪不許初廣東鹽不出

境鹽歲積而商以困往往賄關吏私市之廣西  
盛䟽言聽之則利商而壞法禁之則商滯而利  
歸津隘請聽商計鹽輸粟而後出境公私兩利  
之成化初陞右副都御史巡撫宣撫乃修復前  
所建官牛官田法墾地益廣積粟益富以其餘  
歲市馬千八百疋繕治屯堡數百所三年擢禮  
部右侍郎五年轉吏部八年命視河套奏言搜  
河套復東勝皆事勢所難宜增築城堡募新軍  
以實邊而選土兵以助守從之九年進左侍郎



十年卒賜謚文莊所著有西垣奏草上谷奏篇  
水東日記菴竹堂集